



Centralna banka
BOSNE I HERCEGOVINE
Централна банка
БОСНЕ И ХЕРЦЕГОВИНЕ



SEDMIČNI PREGLED KRETANJA NA GLOBALNIM FINANSIJSKIM TRŽIŠTIMA

02.12.2024. – 06.12.2024.

ODJELJENJE ZA BANKARSTVO, SLUŽBA FRONT OFFICE



Sarajevo, 09.12.2024. godine

**SEDMIČNI PREGLED KRETANJA NA GLOBALNIM FINANSIJSKIM TRŽIŠTIMA
02.12.2024. – 06.12.2024.**


Tabela 1: Prikaz kretanja prinosa na državne obaveznice

Prinosi	Eurozona		SAD		Velika Britanija		Japan	
	29.11.24	6.12.24	29.11.24	6.12.24	29.11.24	6.12.24	29.11.24	6.12.24
2 godine	1,95	2,00	4,15	4,10	4,23	4,26	0,59	0,60
5 godina	1,93	1,97	4,05	4,04	4,09	4,13	0,72	0,73
10 godina	2,09	2,11	4,17	4,15	4,24	4,28	1,05	1,06

Tabela 2: Prikaz kretanja prinosa na njemačke Bubillove

Dospijeće	Prinosi		
	29.11.24	6.12.24	
3 mjeseca	2,603	2,679	↗
6 mjeseci	2,487	2,490	↗
1 godina	2,246	2,269	↗

Graf 1: Prikaz krivulja prinosa državnih obaveznica



Graf prikazuje krive prinosa Njemačke (zelena), SAD (plava), Velike Britanije (crvena) i Japana (ljubičasta) za periode od 3 mjeseca do 30 godina na dane 06.12.2024. godine (pune linije) i 29.11.2024. godine (isprekidane linije). Na donjem dijelu grafa je prikazana razlika između vrijednosti odgovarajućih prinosa na navedene datume.

EUROZONA

Prinosi obaveznica eurozone su bilježili volatilna kretanja tokom prošle sedmice. Na sedmičnom nivou prinosi njemačkih obaveznica su povećani između 2 i 5 baznih poena, prinosi francuskih obaveznica su blago smanjeni za 1 do 2 bazna poena, dok su prinosi italijanskih obaveznica srednje i duže ročnosti smanjeni za 3 i 8 baznih poena, respektivno. Proteklu sedmicu obilježilo je neizglasavanje povjerenja Vladi Francuske, kao što su tržišni učesnici i očekivali. Agencija za dodjelu kreditnog rejtinga S&P je upozorila da kolaps francuske vlade čini smanjenje fiskalnog deficita neizvjesnim, što bi moglo rezultirati vjerovatnim manjim smanjenjem istog. Predsjednik Macron je u potrazi za novim premijerom, koji bi trebalo da usmjeri duboko podijeljen Parlament da odobri budžet za narednu godinu, čiji je cilj smanjenje budžetskog deficita. Lider krajnje desnice u Francuskoj Le Pen je izjavila da Francuska može napraviti budžet u narednih nekoliko sedmica ukoliko novi premijer bude spreman da sporije smanjuje deficit. Agencija Moody's također upozorava na povećane rizike zbog opterećenja dugovanja, te zadržava negativne izgleda na rejting (Aa2). Državna agencija za statistiku Italije je prepolovila prognoze rasta BDP-a zemlje za ovu godinu na 0,5% (u junu očekivano 1,0%), a najviše zbog slabijih investicija i slabe njemačke ekonomije, najvećeg izvoznog tržišta Italije. Predsjednik Deutsche Bundesbank Nagel je zatražio od Vlade Njemačke da ublaži pravila potrošnje zbog slabih ekonomskih izgleda Njemačke, te predlaže reformu gornjeg nivoa duga kako bi se posvetilo dugoročnim

Odricanje od odgovornosti (Disclaimer)

Navedeni pregled kretanja je zasnovan na eksternim izvorima i ne sadrži bilo kakve komentare, procjene i stavove CBBiH. Centralna banka ne može garantovati njihovu tačnost i ne snosi odgovornost za direktnu ili indirektnu štetu koja može nastupiti kao posljedica korištenja ili nemogućnosti korištenja informacija, materijala ili sadržaja, ili za posljedice odluka donesenih na osnovu njih.

rizicima poput odbrane i infrastrukture. Prema OECD, očekuje se da će BDP Njemačke zabilježiti rast od 0,7% u 2025. godini (manje od ranije očekivanih 1,1%), a za 2026. godinu se očekuje rast od 1,2%, dok se u tekućoj godini očekuje stagnacija.

Prema posljednjem objavljenom istraživanju Bloomberg-a očekuje se da će ECB brže smanjivati kamatne stope nego što je ranije očekivano, te učesnici ovog istraživanja, pored očekivanog smanjenja za 25 baznih poena na decembarskoj sjednici, očekuju da će ECB smanjivati kamatne stope na svakoj sjednici do juna naredne godine, dok kamatna stopa na depozite (DFR) ne dostigne nivo od 2,0%. Veći broj zvaničnika ECB tokom protekle sedmice nastavio je da se zalaže za dalje smanjenje kamatnih stopa u decembru. Predsjednica ECB Lagarde je EU parlamentarcima saopštila da se borba ECB protiv inflacije približava kraju, ali "da još uvijek imaju dio posla da urade". Upozorila je da će ekonomija ostati krhka zbog usporenja rasta i geopolitičkih rizika. Član UV ECB Cipollone je izjavio da bi uvozne carine novoizabranog predsjednika SAD Trumpa mogle smanjiti rast i inflaciju u eurozoni. Cipollone tvrdi da će tarife oslabiti ekonomiju, smanjujući potrošnju i pritisak na cijene. Njegov kolega Panetta tvrdi da je EU potrebno zajedničko zaduživanje kako bi se "takmičila" sa SAD i potakla inovacije, te predlaže zajednički fiskalni kapacitet za finansiranje javnih dobara, s obzirom na to da se zaduživanje Fonda EU za oporavak završava 2026. godine.

Tabela 3: Kretanje ekonomskih indikatora za eurozonu

Red. Br.	Ekonomski indikatori	Očekivanje	Stvarno	Prethodni
			stanje	period
1.	BDP – EZ (Q/Q) final. III kvartal	0,4%	0,4%	0,2%
2.	BDP – Italija (Q/Q) final. III kvartal	0,0%	0,0%	0,2%
3.	BDP – Grčka (Q/Q) III kvartal	-	0,3%	1,2%
4.	PMI kompozitni indeks – EZ (final.) NOV	48,1	48,3	50,0
5.	Proizvođačke cijene – EZ (G/G) OKT	-3,2%	-3,2%	-3,4%
6.	Fabričke porudžbine – Njemačka (G/G) OKT	1,8%	5,7%	4,2%
7.	Industrijska proizvodnja – Njemačka (G/G) OKT	-3,3%	-4,5%	-4,3%
8.	Industrijska proizvodnja – Francuska (G/G) OKT	-0,2%	-0,6%	-0,5%
9.	Industrijska proizvodnja – Španija (G/G) OKT	0,6%	1,9%	1,1%
10.	Prerađivačka proizvodnja – Francuska (G/G) OKT	-	-1,4%	-0,8%
11.	Trgovinski bilans – Francuska (u milijardama EUR) OKT	-	-7,67	-8,42
12.	Bilans tekućeg računa – Francuska (u milijardama EUR) OKT	-	-2,6	-2,4
13.	Maloprodaja – Italija (G/G) OKT	-	2,6%	0,7%
14.	Maloprodaja – Holandija (G/G) OKT	-	2,0%	2,6%
15.	Potrošnja stanovništva – Holandija (G/G) OKT	-	0,4%	2,6%
16.	Zaposlenost – EZ (Q/Q) final. III kvartal	0,2%	0,2%	0,2%
17.	Stopa nezaposlenosti – EZ OKT	6,3%	6,3%	6,3%
18.	Stopa nezaposlenosti – Italija OKT	6,1%	5,8%	6,0%
19.	Stopa nezaposlenosti – Belgija OKT	-	5,8%	5,8%
20.	Stopa nezaposlenosti – Irska NOV	-	4,1%	4,2%
21.	Promjena broja nezaposlenih – Španija (u '000) NOV	-	-16,0	26,8

SAD

Iako je na globalnom nivou zabilježen rast, prinosi američkih državnih obaveznica su tokom protekle sedmice smanjeni duž cijele krive. U fokusu tržišnih učesnika je bilo objavljivanje podataka sa tržišta rada, te indeksa o prerađivačkom i uslužnom sektoru za novembar.

Zvaničnici Feda su protekle sedmice bili prilično aktivni po pitanju izjava oko daljih koraka vezanih za monetarnu politiku. Predsjednik Feda Powell je umanjio izgleda za tenzije sa dolazećom Trumpovom administracijom, te je istakao da očekuje da će zvaničnici biti oprezniji dok nastavljaju smanjivati kamatne stope. Predsjednica Feda iz San Francisca Daly je izjavila da nema hitnosti za smanjenje kamatnih stopa, ističući da zvaničnici mogu pažljivo odlučivati vezano za naredne korake o monetarnoj politici. Predsjednik Feda iz Atlante Bostic i dalje je neodlučan u pogledu decembarskog smanjenja kamatnih stopa, ali podržava nastavak smanjenja istih u narednim mjesecima.

Odricanje od odgovornosti (Disclaimer)

Navedeni pregled kretanja je zasnovan na eksternim izvorima i ne sadrži bilo kakve komentare, procjene i stavove CBBiH. Centralna banka ne može garantovati njihovu tačnost i ne snosi odgovornost za direktnu ili indirektnu štetu koja može nastupiti kao posljedica korištenja ili nemogućnosti korištenja informacija, materijala ili sadržaja, ili za posljedice odluka donesenih na osnovu njih.


Bostic vjeruje da su rizici za zapošljavanje i stabilnost cijena uravnoteženi, što ukazuje na neutralan stav monetarne politike. Istakao je da je inflacija na održivom putu prema Fedovom cilju od 2% i napominje da je tržište rada stabilno, bez znakova brzog pogoršanja. Član FOMC-a Waller "naginje" prema tome da podrži smanjenje referentne kamatne stope ovog mjeseca, izuzev u slučaju negativnog iznenađenja u vidu dokaza upornosti inflacije. Predsjednik Fed-a iz Njujorka Williams očekuje da će "s vremenom" vjerovatno biti potrebno još smanjenja kamatnih stopa. Kreatori monetarne politike smanjili su referentnu kamatnu stopu za 75 baznih poena od septembra, favorizujući postepena smanjenja u narednom periodu. većina tržišnih učesnika očekuju da će Fed na sjednici naredne sedmice smanjiti referentnu kamatnu stopu za 25 baznih poena.

Prošle sedmice je objavljen Fedov izvještaj o stanju u privredi SAD, poznatiji kao "Beige Book", u kojem je navedeno da je ekonomska aktivnost neznatno porasla u novembru nakon malih promjena u prethodnim mjesecima, a preduzeća u SAD su postala optimističnija u pogledu izgleda potražnje. Iako je rast ekonomske aktivnosti bio skroman, očekivanja vezana za rast su umjereno porasla u većini regija i sektora. Poslovni subjekti su izrazili optimizam da će potražnja rasti u narednim mjesecima, dok je potrošnja stanovništva generalno bila stabilna.

Tabela 4: Kretanje ekonomskih indikatora za SAD

Red. br.	Ekonomski indikator	Očekivanje	Stvarno stanje	Prethodni period	
1.	Stopa nezaposlenosti	NOV	4,1%	4,2%	4,1%
2.	Promjena zaposlenih nefarmerski sektor	NOV	220.000	227.000	36.000
3.	Promjena zaposlenih privatni sektor	NOV	205.000	194.000	-2.000
4.	Promjena zaposlenih prerađivački sektor	NOV	30.000	22.000	-48.000
5.	Inicijalni zahtjevi nezaposlenih za pomoć	30. nov	215.000	224.000	215.000
6.	Kontinuirani zahtjevi nezaposlenih za pomoć	23. nov	1.904.000	1.871.000	1.896.000
7.	ADP indeks promjene broja zaposlenih	NOV	150.000	146.000	184.000
8.	PMI indeks prerađivačkog sektora F	NOV	48,8	49,7	48,5
9.	Potrošnja građevinskog sektora (M/M)	OKT	0,2%	0,4%	0,1%
10.	ISM indeks prerađivačkog sektora	NOV	47,5	48,4	46,5
11.	Broj zahtjeva za hipotekarne kredite	29. nov	-	2,8%	6,3%
12.	ISM indeks uslužnog sektora	NOV	55,7	52,1	56,0
13.	Fabričke porudžbine	OKT	0,2%	0,2%	-0,2%
14.	Porudžbine trajnih dobara (final.)	OKT	0,2%	0,3%	-0,4%

Graf 2: Kretanje kursa EURUSD tokom protekle sedmice



USD je aprecirao u odnosu na EUR, te je kurs EURUSD zabilježio pad sa nivoa od 1,0577 na nivo od 1,0568.

VELIKA BRITANIJA

BoE je upozorila da će se 4,4 miliona domaćinstava suočiti sa višim otplatama hipotekarnih kredita u naredne 3 godine. Cijene kuća su u novembru porasle za 3,7% na godišnjem nivou, što je najviša stopa rasta u posljednje dvije godine, potaknuta rastom plata i smanjenjem kamatnih stopa na hipotekarne kredite. Prema podacima Kancelarije za nacionalnu statistiku (ONS), radna snaga Velike Britanije je veća nego što je ranije procijenjeno, što oslikava rast imigracija od perioda pandemije. Međutim, produktivnost je u Velikoj Britaniji niža nego što se ranije mislilo.

Guverner BoE Bailey podržava ideju o četiri smanjenja kamatnih stopa sljedeće godine ukoliko ekonomski izgledi ostanu stabilni. Bailey je istakao da je inflacija pala brže nego što je očekivano, sa rekordne vrijednosti od 11,1% krajem 2022. godine na 2,3% u oktobru ove godine. BoE je već smanjila referentnu kamatnu stopu na 4,75% ove

Odricanje od odgovornosti (Disclaimer)

Navedeni pregled kretanja je zasnovan na eksternim izvorima i ne sadrži bilo kakve komentare, procjene i stavove CBBiH. Centralna banka ne može garantovati njihovu tačnost i ne snosi odgovornost za direktnu ili indirektnu štetu koja može nastupiti kao posljedica korištenja ili nemogućnosti korištenja informacija, materijala ili sadržaja, ili za posljedice odluka donesenih na osnovu njih.

godine, te signalizuje dalja smanjenja, ali oprezno, zbog uporne inflacije usluga. Izvještaj OECD upozorava na to da bi kamatne stope mogle padati sporije zbog povećanja poreza, potrošnje i pozajmljivanja u jesenjem budžetu. Članica MPC BoE Dhingra zauzima se za nova smanjenja kamatnih stopa, navodeći da restriktivne mjere negativno utiču na životni standard, poslovne investicije i produktivnost. Tržišta ne očekuju novo smanjenje kamatnih stopa na predstojećem sastanku 19. decembra, a predviđaju smanjenje od oko 71 bazni poen u narednoj godini.

Bez obzira na visoke rizike, predviđa se da će globalna ekonomija rasti za 3,2% ove godine i za 3,3% sljedeće godine, što je malo bolje od ranijih prognoza. Očekuje se da će u narednih godinu dana inflacija dostići nivo od 2,8%, što je više od prethodnih 2,5% i očekivanih 2,6%. Prema istraživanju BoE, više od polovine britanskih kompanija očekuje da će povećati cijene i smanjiti broj zaposlenih zbog novih troškova državnog osiguranja. Ranije prethodne sedmice guverner BoE Bailey je istakao da rast doprinosa za državno osiguranje ima ključan uticaj na dalje odluke o kamatnim stopama. Poslovni optimizam je na najnižem nivou od oktobra 2023. godine, a inflacija cijena inputa je najviša od maja 2023. godine. Premijer Starmer je ponovio da ima ambiciju da Velika Britanija dostigne najbrži ekonomski rast po glavi stanovnika u G7.

Tabela 5: Kretanje ekonomskih indikatora za UK

Red. br.	Ekonomski indikator	Očekivanje	Stvarno	Prethodni	
			stanje	period	
1.	Cijene kuća prema Nationwide (G/G)	NOV	2,4%	3,7%	2,4%
2.	PMI indeks građevinskog sektora (final.)	NOV	48,6	48,0	49,9
3.	PMI indeks uslužnog sektora (final.)	NOV	50,0	50,8	52,0
4.	PMI kompozitni indeks (final.)	NOV	49,9	50,5	51,8
5.	PMI indeks građevinskog sektora	NOV	53,5	55,2	54,3
6.	Promjena zvaničnih rezervi (u mln USD)	NOV	-	-979	-945
7.	Promjena broja novoregistrovanih automobila (G/G)	NOV	-	-1,9%	-6,0%

Tokom protekle sedmice GBP je aprecirala u odnosu na EUR, pa je kurs EURGBP zabilježio pad sa nivoa od 0,83059 na nivo od 0,82932. GBP je aprecirala i u odnosu na USD, pa je kurs GBPUSD povećan sa nivoa od 1,2735 na nivo od 1,2744.

JAPAN

Vlada Japana je predložila povećanje ciljanog povrata na investicije Vladinog penzionog investicionog fonda (GPIF) vrijednog 1,7 biliona USD na 1,9% iznad rasta plata sa prethodnih 1,7%. Cilj prijedloga je povećanje prinosa s obzirom na starenje stanovništva i rast inflacije.

Kyodo je izvijestio da Vlada Japana i vladajuće stranke planiraju povećati prag za oslobađanje od poreza na dohodak od januara 2026. godine da bi usljed nedostatka radne snage potakli zaposlene na pola radnog vremena da više rade. Trenutni nivo od 1,03 miliona JPY (6.900 USD) mogao bi se, prema predloženom povećanju, koje je podržala Demokratska stranka za narod (DPP), povećati na 1,78 miliona JPY.

Guverner Ueda je naglasio da je povećanje referentne kamatne stope "blizu" ako ekonomija nastavi očekivani razvoj. Inflacioni momenat je održan, preduzeća planiraju da investiraju, a plate rastu. Član MPC BoJ Nakamura je izjavio da centralna banka mora pažljivo analizirati ekonomske pokazatelje kao što su plate i poslovni sentiment prije nego što donese odluku o povećanju kamatnih stopa ovog mjeseca. On je naglasio da bilo koja odluka treba biti zavisna od podataka i odražavati ekonomska poboljšanja.

Vodeće životne osiguravajuće kuće smanjile su hedžiranje od aprecijacije JPY na najniži nivo u posljednjih 13 godina, na nivo od 45,2% u septembru, što je ispod 47% od šest mjeseci ranije, a zbog sve veće razlike u kamatnim stopama između Japana i SAD. Manje hedžiranje pruža olakšanje, ali osiguravajuće kuće će morati da prilagode svoje strategije ukoliko JPY značajno aprecira.

Tabela 6: Kretanje ekonomskih indikatora za Japan

Red. br.	Ekonomski indikatori	Očekivanje	Stvarno	Prethodni
			stanje	period
1.	Kapitalna potrošnja (G/G) III kvartal	6,7%	8,1%	7,4%
2.	PMI indeks prerađivačkog sektora (final.) NOV	-	49,0%	49,2%
3.	Monetarna baza (G/G) NOV	-	-0,3%	-0,3%
4.	PMI indeks uslužnog sektora (final.) NOV	-	50,5	49,7
5.	Kompozitni PMI indeks (final.) OKT	-	50,1	49,6
6.	Zarade (G/G) OKT	2,6%	2,6%	2,5%
7.	Potrošnja domaćinstava (G/G) OKT	-2,5%	-1,3%	-1,1%
8.	Vodeći indeks (prelim.) OKT	108,8	108,6	108,9
9.	Koincidirajući indeks (prelim.) OKT	117,7	116,5	114,0
10.	Realne zarade (G/G) OKT	-0,1%	0,0%	-0,4%

JPY je tokom protekle sedmice deprecirao u odnosu na EUR, te je kurs EURJPY zabilježio rast sa nivoa od 158,41 na nivo od 158,55. JPY je deprecirao i u odnosu na USD, te je kurs USDJPY zabilježio rast sa nivoa 149,77 na nivo od 150,00.

NAFTA I ZLATO


Cijena jednog barela sirove nafte na otvaranju tržišta u ponedjeljak je iznosila 68,00 USD (64,29 EUR).

Do sredine sedmice cijena nafte je bilježila rast, nakon čega je bilježila smanjenje do kraja sedmice. Početkom sedmice cijena ovog energenta je povećana, nakon što su proizvodne aktivnosti u SAD i Kini porasle više nego što se očekivalo prošlog mjeseca. Veći rast cijene je bio ograničen, s obzirom na to da su podaci pokazali da je proizvodnja sirove nafte OPEC-a porasla drugi mjesec u novembru, dostigavši 27,02 miliona barela dnevno, što je povećanje za 120.000 barela. Povećanje je uglavnom uzrokovano oporavkom u Libiji od političkih poremećaja. Proizvodnja u Libiji je porasla za 110.000 barela na 1,14 miliona dnevno nakon ponovnog pokretanja naftnog polja Šarara. U utorak je cijena nafte povećana za skoro 3%, dok su investitori bili u iščekivanju odluka sastanka OPEC+, a vezano za odgodu planiranog povećanja proizvodnje ovog energenta za tri mjeseca. Međutim, u srijedu je cijena nafte smanjena za 2% u odnosu na prethodni dan. Prema istraživanju Haynes Boonea, analitičari prognoziraju da će se referentna vrijednost WTI smanjiti na nivo oko 58 USD po barelu do sredine Trumpovog novog mandata.

U skladu sa očekivanjima, OPEC+ je na sastanku održanom 5. decembra, odgodio planirano povećanje proizvodnje do aprila 2025. godine i produžio potpuno opuštanje rezova proizvodnje do kraja 2026. godine. Postepeno ukidanje smanjenja od 2,2 miliona barela dnevno će početi u aprilu naredne godine sa mjesečnim povećanjem od 138.000 barela dnevno. Iz grupe koju predvode Saudijska Arabija i Rusija je saopšteno da će se proizvodnja članica održavati na 39,7 miliona barela dnevno, što je manje u poređenju sa prethodno dogovorenim nivoom od 40,5 miliona barela dnevno, a ciljevi uključuju povećanje kvote za 300.000 barela dnevno za Ujedinjene Arapske Emirate. Na kraju sedmice cijena nafte je zabilježila smanjenje na najniži nivo u posljednje tri sedmice, zbog zabrinutosti u pogledu ponude ovog energenta.

Na zatvaranju tržišta u petak cijena jednog barela sirove nafte je iznosila 67,20 USD (63,59 EUR), što predstavlja pad od 1,18% na sedmičnom nivou.

Graf 3: Kretanje cijene nafte tokom protekle sedmice



Na otvaranju londonske berze metala u ponedjeljak cijena jedne fine unce zlata je iznosila 2.660,69 USD (2.515,54 EUR).


Tokom protekle sedmice cijena zlata je bilježila volatilna kretanja. Početkom sedmice ista je smanjena pod uticajem rasta prinosa američkih državnih obaveznica i aprecijacije USD, nakon objavljivanja pozitivnih podataka o prerađivačkom sektoru u SAD. U utorak je zabilježen rast cijene zlata, jer su politička previranja u Južnoj Koreji i Francuskoj potakla potražnju za imovinom sigurnog utočišta. Sredinom sedmice cijena zlata se kretala u uskom rasponu, dok je u četvrtak smanjena, dok su tržišni učesnici bili u iščekivanju objavljivanja podataka sa tržišta rada u SAD. Na kraju sedmice cijena zlata je zabilježila blagi rast, nakon što su podaci sa tržišta rada u SAD podržali očekivanja o smanjenju referentne kamatne stope ovog mjeseca. Cijena zlata je bila podržana i vijestima da je Centralna banka Kine u novembru, nakon šestomjesečne pauze, nastavila sa kupovinama ovog plemenitog metala.

S obzirom na to da je Izrael u prethodnim danima u nekoliko navrata prekršio sporazum sa Hezbolahom, očekuje se nastavak rasta geopolitičkih tenzija u toj regiji, što bi moglo povećati privlačnost aktiva sigurnog utočišta, kao što je zlato. Također, očekuje se da će i najnovija dešavanja u Siriji, nakon pada Vlade predsjednika Bashara al-Assada, uticati na rast cijene ovog plemenitog metala u narednom periodu.

World Gold Council je objavio da Indija, Turska i Poljska vode u neto kupovinama zlata od početka godine. Centralne banke su ovog mjeseca prijavile 60 tona neto kupovine, što je najveći iznos od početka godine.

Na zatvaranju tržišta u petak cijena jedne fine unce zlata je iznosila 2.633,37 USD (2.491,83 EUR), što predstavlja pad od 1,03% na sedmičnom nivou.

Graf 4: Kretanje cijene zlata tokom protekle sedmice



Odricanje od odgovornosti (Disclaimer)

Navedeni pregled kretanja je zasnovan na eksternim izvorima i ne sadrži bilo kakve komentare, procjene i stavove CBBiH. Centralna banka ne može garantovati njihovu tačnost i ne snosi odgovornost za direktnu ili indirektnu štetu koja može nastupiti kao posljedica korištenja ili nemogućnosti korištenja informacija, materijala ili sadržaja, ili za posljedice odluka donesenih na osnovu njih.